

# QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

## IN SCHOLIS MEDICORUM.

Die Jovis 17. Novembris.

M. ANTONIO DE SAINT-YON.

DOCTORE MEDICO, PRÆSIDE.

*An nobis ingeniosiores?*

I.

**H**OMO constat ex corpore & anima: illud ita figuratum est, ut excellat aliis; hæc ita constituta, ut & sensibus instructa sit, & habeat præstantiam mentis, in qua sit mirabilis vis quædam rationis, & cognitionis, & scientiæ, virtutumque omnium. utriusque colligatio plena est miraculi, nullâ, quam firma duorum copula exigere necessario solet, interjectâ substantiæ affinitate; fungi tamen potest aliqua, sed obscurior; namque ut in malis attingit animi naturam corporis similitudo: sic & in bonis. sunt in corpore præcipua, pulchritudo, vires, valetudo, firmitas, velocitas: sunt item in animo: corporis temperatio est, cum ea congruunt inter se ex quibus constamus, sanitas sic animi dicitur, cum ejus judicia opinionisque concordant, eaque animi est virtus: & ut corporis est quædam apta figura membrorum cum coloris suavitate, quæ pulchritudo dicitur; ita etiam in animo opinionum judiciorumque æquabilitas & constantia cum firmitate quadam & stabilitate, virtutis vim ipsam continens, pulchritudo vocatur. Mentis, quæ pars est animæ princeps, duo sunt virtutum genera. Unum earum quæ in voluntate positi sunt quarum excellens est in animorum laude præstantia, suntque prudentia, justitia, fortitudo, temperantia. Alterum earum quæ ingenerantur suapte naturâ, suntque non voluntariæ, docilitas, memoria, intellectus, ingenium. Quemadmodum velocitas est corporis, celeritas dicta; eadem etiam ingenij laus habetur, propter animi multarum rerum brevi tempore percurfionem: injurijs profecto sunt in hominem qui ingenium vel Deum, quo quasi obstetricante ad intelligendum impellatur, sunt arbitrati, vel genium aliquem unicuique nostrum tanquam nauclerum navi gubernandæ presentem, vel vim à cælo dilapsam, ex qua ut lumen à sole manet cogitatio. Nemo est qui non illud sibi à natura concessum

ingenitumque sentiat, ejusque sese tam participem, ut rarus sit qui alteri eo cedere voluerit. Est namque vis animæ iusta quâ cito & facile abstrusa quæque, cognituque difficilia percipit, eligit ac discernit quod bonum est, rationesque & auxilia quibus scopum finemve consequatur, illico exco- gitat; cui si accesserint docilitas & memoria, tum demum egregium præ- stantissimumque erit ingenium.

## II.

**Q**UID interest inter mentes hominum & cogitationes! tanta varietas est, tamque dissimilis facies ingeniorum, quanta vultuum atque ca- pitum. Sunt quædam plebeia, quæ in angustas damnata cogitationes, nihil generosum sapiunt atque magnificum: sunt futilia, quæ rimarum plena, hæc atque illac perfluunt, unâ levitate constantia: sunt pingua, ad cogitan- dum hebetia, ad capiendas disciplinas, nisi improbis laboribus exanthlatis, incommoda, quibus finitima, tortuosa, quæ de recta rationis regione & viâ nunquam non deflectunt, quæque suis implicata vestigiis, hærent adeo sese vix ut expedire queant. Invenias extemporaneæ subtilitatis, quæ para- tam habent in omne argumentorum genus, aciem; primo tamen impetu obstupefcentem. Reperias gravia, robusta, valentia, singulari solertia & acri judicio prædita, quæ in arduis versata negotiis breviter hæc conficiunt. Non desunt temperata, quæ si ad aliquod studium sese adjunxerint nihil egregie præter cetera, sed tamen omnia mediocriter faciunt, ad cultum hu- manitatis & bonarum artium satis apposita: sunt denique prope divina, in quibus summa sunt omnia, industria in agendo, celeritas in conficiendo, consilium in providendo, quantum potest cogitari, maximum; tam ad in- veniendum prompta, quam ad judicandum acuta: sic homo homini mul- tum præstat, stultoque intelligens quam maxime interest. Nihil discriminis est inter animos, quos cum major aliqua causa atque diviniore creaverit; pa- res sunt origine, nobilitate, agendique ratione. Tanta tamque ingens inter- capedo unius est corporis ex meliore deterioreve luto ficti, cui quamdiu mens alligata est, pulcherrime nequit sua obire munia, corpore semper ali- quid ipsi afficante. Ignis sui ubique similis materię accensæ, vires sic sæpe sequitur, ut à se multum discrepet motu, luce, calore, comburendi potesta- te: haud dispar est animæ, quousque corporis custodia tenetur, conditio: hinc cum illo quasi crescere pariterque senescere videtur; afficitur imprimis temperie & conformatione, omnium quidem partium, maxime vero cere- bri, quod custos est, mentisque dominus. Hoc uno sapit homo aut insanit, ingenio est felici, vel misero. Ingeniosiores quibus obtigit amplum, calidum siccum, non nihil tamen humidum, tenuioris potius quam crassioris sub- stantiæ, rarioris quam densioris, omnis generis ductibus neque angustiori- bus neque laxioribus pervium, excipiendis spiritibus, perficiendis, emitten- dis halitibus, humorumque reliquiis peridoneum; quod alluat non cujuslibet sanguinis rivulus, sed puri, calidi, placide appellentis, qui majorem partem in spiritus purgatissimos, tennes, siccis, perlucidos vertatur; cu- jusmodi sunt *μελανισσάρχει* ex bilioso temperatoque sanguine geniti.

## III.

**F**ORTUNATIORES sane liberi, quibus gignendis venus ipsa præsidet, cujus lepore atque illecebris capti conjuges, errantes animas

ita transfundunt ut nihil valeant nisi latum & amabile quidquam ex sese producere: virum mulieri dedit vel amor, vel lex consuetudoque patriæ: qui ex illo nascuntur conjugio pueri, quod iis pater incertus sit, spurij, ἀνόητοις audiunt, nothi dumtaxat ex hominum instituto, quippe quibus gignendis longe sapius majori naturæ impulsu, quam iustâ uxore natæ impenditur opera, maritali connubio, quod comparatum est ut jucundissima simul & utilissima vitæ societas iniretur, plerumque desunt, quæ prolem beare nata sunt lenocinia: desunt veneris harmoniæ, adeo frequenter formæ impares atque animi, sævo cum joco sub jugum veniunt, placidis junguntur inimitia, agni geminantur tigribus? nunc quæ pro more hominum solito, nuptiæ non tam matrimonij dignitate; quam avaritiæ societate conglutinantur: haud infrequenter amoris satietas & fastidium, consuetudinis comes, virum mulieremque non solum ignaviores reddunt, sed etiam deterrent ab officio: assiduus alieni fundi cultus, familiarem incultum relinquit, vel quem admodum idem semen sibi semper creditum tellus negligit & repudiat: itidem uterus naturæ arvus & favilla generis humani, nunquam tam avidè genitalium succum cui assuescit amplexus, non raro sobolem datum corpore, tum animo vitiosam. Ubi vero mulier corpore solido, succi pleno, quam jocus & cupido circumvolat, undique quoquo versum amorem jactans, nitore, grata protervitate, munditiis, vultu non adeo modesto, sed venusto ut nihil supra, Pamphilum aliquem urit, in quem subito tota ruit venus, nihil ut pensi habeat dum sua glycerio vel vi vel clam vel pretio potiatur, occasionemque tam vehementer optatam reperit; fieri non potest, quin inde dulcissimum amoris pignus, perfectum, elegans, elaboratumque prodeat.

## I V.

**O** MNIBUS ex animi perturbationibus est profecto nulla vehementior libidine, voluptatis, quæ incredibilis existimatur percipiendæ, longe potius quam immortalitatis comparandæ cogitatione accensâ. Ex hac contingit adeo homines immutari, ut eosdem esse nequidem cognoveris: senibus juvenilem animum: vietus corporibus alacritatem affert; stupidis sensum, agrestibus elegantiam, feris lenitatem. Non solum ubi triumphat, hæc præstat miracula, sed & res extrinsecus positas ad quas sese applicat, gratissimo errore alias omnino ac sint exhibet: nihil plus salis plusque leporis habet, suo quippe condimento quidvis placitum est, fel quod est amarum, id mel efficitur; quod turpe pulchrum, quod deforme perfectum. Scilicet forma, quam alius impressam cerebro gerit amore captus, suâ venustate sic factum facit, ut quidquid menti occurrit, pulchre concinnatum videatur, quo seu pabulo multo acrius urit, corpusque exagitat. Qualibet commotione ceruus in mole sanguinis succus effervescent, modo huc, modo illuc, modo in altum, modo in extremum corpus truditur: irâ igneus humor: tristitiâ terreus; metu frigidior, & aquæ naturam redolens: cupidine pinguior, purior, generationi peragendæ aptior, intestinâ spirituum agitatione fecernitur, optimo naturæ consilio ad partes genitales impellendus, ibique spirituum subsilientium uberiore concursu, vertitur in semen nullâ conditione defectum, imo nobiliore præditum effractione. Quod si tum veneream voluptatem furtim expleant vir mulierque amore implicati, eò

feliciores sunt in prole propaganda, <sup>4</sup> quo magis mutuo ardore conspirant, & communia quærentes gaudia, robustamque voluptatem, conantur penetrare abireque in corpus toto corpore: quibus mutuo ambitu alligatis, tum largo semine, vividiorum secum ignem raptu quodam deferente, gravida redditur mulier, perfectiorque fit animarum mixtura. Satiùs enim est, longeque utilius nascituris, virum habere mentem in opere, quam in aliâ re occupatam, feminamque amore furere? Cur heronum filij noxæ, quod animam in meditatione tota, quidquid nobilioris est caloris rapiens, fœtus genium defraudet: in eo quidem infeliciores, furtivo concubitu natis, quibus efficiendis & ratio & natura pari studio incumbunt: quidquid melioris est sanguinis, vis in semine residens alacrior reddita, trahit ad fingendum corpus: partes primariæ multo calore vitali, inuitoque spiritu ac humore primigenio plenæ, reliquis gratiam aspirant; totaque hominis æconomia suis omnibus numeris est absoluta.

## V.

**B**E NE conveniunt & in unâ sede morantur pulchritudo corporis & ingenij; sanitas & intelligentia, utriusque robur & firmitas. Nothorum *invisita* ad intelligendum & agendum, ad quas res nascimur aptiores reddit. Hos voluit venus omnibus ornatos dotibus excellere, nobiliores gerere spiritus, sensus habere acerrimos, cæteros ingenij abundantia, acrimonia, cogitationis robore, celeritate, nitore, elegantia longo post se intervallo relinquere. Si ad disciplinas animum appulerint, facile fiunt primarum artium principes, rerum naturas penetrando, aperiendo, dividendo, si ad negotia vitæ utilia, quæ valent solertia industriâ, audaciâ, pene omnia expediunt, ferunt ut phormiones alteri quodvis oneris sibi impositum, vasto versutoque animo mille vias rei faciendæ reperiunt, in hominum societate atque commercio, nescio quâ agendi venustate omnium oculos & benevolentiam ad se capiunt; quidquid egerint, faustum felicemque exitum habet: ut quædam, ad amplitudinem & gloriam & ad res magnas bene gerendas, fortuna iis divinitus adjuncta esse videatur.

*Ergo nothi ingeniosiores.*

## DOMINI DOCTORES DISPUTATURI.

*M. Antonius le Moine.*

*M. Petrus Legier.*

*M. Franciscus le Vignon.*

*M. Guido Crescentius Fagon, Famula Reginae Medicus ordinarius.*

*M. Nicolaus Robin.*

*M. Petrus Legier.*

*M. Iacobus de Bourges.*

*M. Franciscus Sorand. M. Claudius Germain.*

Proponebat Lutetiæ NICOLAUS RAVEAU,  
Villonixus, A. R. S. H. MDCLXXII.

P A R I S I I S,

Ex Typographiâ FRANCISCI MUGUET, Regis &  
Illustrissimi Archiepiscopi Typographi, viâ Citharæ.